

## ՀԱՄԱՃԱՅՆԱԳԻՐ

Հայաստանի Հանրապետության կրթության և գիտության նախարարության  
գիտության պետական կոմիտեի

և

Բելառուսի Հանրապետության գիտության և տեխնոլոգիաների պետական կոմիտեի  
միջև

համագործակցության մասին

Հայաստանի Հանրապետության կրթության և գիտության նախարարության  
գիտության պետական կոմիտեն և Բելառուսի Հանրապետության գիտության և  
տեխնոլոգիաների պետական կոմիտեն (այսուհետ՝ Կողմեր),

հիմք ընդունելով Հայաստանի Հանրապետության կառավարության և Բելառուսի  
Հանրապետության կառավարության միջև 2000 թվականի հոկտեմբերի 31-ին  
ստորագրված «Գիտատեխնիկական համագործակցության մասին» Համաձայնագիրը,

առաջնորդվելով հարաբերությունների ամրապնդման և երկու երկրների  
ժողովուրդների միջև եղած ավանդական բարեկամական կապերի զարգացման  
փոխադարձ ցանկությամբ

և ելնելով Հայաստանի Հանրապետության և Բելառուսի Հանրապետության  
գիտության զարգացման շահերից,

համաձայնեցին հետևյալի մասին.

### Հոդված 1

Սույն Համաձայնագրի առարկան երկու Կողմերի համար հետաքրքրություն  
ներկայացնող ոլորտներում համատեղ հիմնարար գիտական հետազոտությունների  
աջակցելու նպատակով Հայաստանի Հանրապետության և Բելառուսի  
Հանրապետության գիտական խմբերի և հետազոտողների միջև համագործակցության  
զարգացմանը նպաստելն է:

### Հոդված 2

Համաձայնագրի շրջանակներում Կողմերը իրականացնում են  
համագործակցություն՝ համատեղ մրցույթների անցկացման տեսքով.

-Հայաստանի և Բելառուսի գիտնականների խմբերի համատեղ իրականացվող  
նախաձեռնողական գիտահետազոտական նախագծերի,

-Հայաստանի Հանրապետությունում և Բելառուսի Հանրապետությունում  
համատեղ գիտական միջոցառումների (համագումարներ, գիտաժողովներ,  
սեմինարներ և այլն) կազմակերպման նախագծերի՝ աջակցության արժանացած  
նախագծերի հետագա ֆինանսավորումով:

Մրցույթների գիտական ուղղությունները, մրցույթների մասին դրույթները, անցկացման  
ժամկետներն ու պայմանները, ինչպես նաև ֆինանսավորման ծավալներն ու կարգը  
որոշվում են համապատասխան մրցույթ հայտարարելուց ոչ ուշ, քան երեք ամիս առաջ:

Կողմերի համաձայնությամբ հիմնարար գիտության բնագավառում կարող  
են կիրառվել համագործակցության նաև այլ ձևեր:

Յուրաքանչյուր Կողմ նաև իրավունք ունի միակողմանի աջակցություն ցուցաբերել Հայաստանի Հանրապետության և Բելառուսի Հանրապետության գիտնականների միջև գիտական համագործակցությանը:

### Հոդված 3

Կողմերը միմյանց օժանդակում են գիտական նյութերի և գրականության փոխանակման հարցում, ներառյալ յուրաքանչյուր Կողմի աջակցությամբ հրատարակվածները, ընդ որում, փոխանակումը իրականացվում է յուրաքանչյուր Կողմի օրենսդրության համաձայն:

### Հոդված 4

Կողմերը միմյանց օժանդակում են գիտական նախագծերի փորձաքննության իրականացման և, որպես փորձագետ, Հայաստանի և Բելառուսի առաջատար գիտնականների ներգրավման հարցում:

### Հոդված 5

Կողմերը լուծում են համատեղ նախագծերի իրականացման ընթացքում ստեղծված մտավոր սեփականության հնարավոր պաշտպանության հարցերը, հաշվի առնելով միջազգային իրավունքի նորմերը և իրենց ազգային օրենսդրությունը:

Համագործակցության ընթացքում ստացված գիտական և գիտատեխնիկական տեղեկատվությունը, երկու պետություններում գործող ազգային օրենսդրություններին համապատասխան, հրապարակման ընդունված եղանակների շրջանակներում մատչելի կլինի համաշխարհային գիտական հասարակությանը:

### Հոդված 6

Կողմերը հրապարակում են սույն Համաձայնագրի կատարման մասին տեղեկատվությունը իրենց պարբերական հրատարակություններում:

### Հոդված 7

Համատեղ գործունեությունը՝ ըստ սույն Համաձայնագրի, Կողմերի միջև իրականացվում է միջազգային պարտավորություններին և յուրաքանչյուր Կողմի ազգային օրենսդրության համապատասխան:

Համաձայնագրի իրագործման հետ կապված հարցերը Կողմերի միջև լուծվում են նամակագրության միջոցով կամ Կողմերի ներկայացուցիչների հանդիպումների ընթացքում:

### Հոդված 8

Կողմերի փոխադարձ համաձայնությամբ սույն Համաձայնագրում կարող են կատարվել փոփոխություններ և լրացումներ, որոնք կձևակերպվեն առանձին արձանագրությամբ: Արձանագրությունը կհանդիսանա սույն Համաձայնագրի անբաժանելի մասը և ուժի մեջ կմտնի դրա ուժի մեջ մտնելու համար սահմանված կարգով:



### Հոդված 9

Սույն Համաձայնագիրը կնքվում է հինգ տարի ժամկետով և ուժի մեջ է մտնում ստորագրման օրվանից :

Սույն Համաձայնագիրը ինքնաբերաբար կերկարաձգվի հետագա հինգ տարիների համար, եթե Կողմերից որևէ մեկը սույն Համաձայնագրի գործողության ժամկետի ավարտից վեց ամիս առաջ մյուս Կողմին գրավոր չձանուցի այն դադարեցնելու իր մտադրության մասին:

Կողմերը կարող են ժամկետից շուտ դադարեցնել սույն Համաձայնագրի գործողությունը: Այս դեպքում Կողմերից յուրաքանչյուրը գրավոր կձանուցի մյուս Կողմին դադարեցման ենթադրվող ժամկետից վեց ամիս առաջ: Այս դեպքում Կողմերը պարտավորվում են կատարել մինչև պայմանագրի դադարեցումը ստանձնած նախագծերի ֆինանսավորման պարտավորությունները:

Կատարված է Մինսկ ք., 2010 թ. մարտի 19-ին, երկու բնօրինակով՝ յուրաքանչյուրը՝ հայերեն և ռուսերեն, ընդ որում բոլոր տեքստերն էլ հավասարազոր են:

|  |  |
|--|--|
| <p>Հայաստանի Հանրապետության<br/>կրթության և գիտության նախարարության<br/>գիտության պետական կոմիտեի<br/>կողմից<br/>Գիտության պետական կոմիտեի<br/>նախագահ</p> <p> Ս. Գ. Հարությունյան</p> | <p>Բելառուսի Հանրապետության գիտության<br/>և տեխնոլոգիաների պետական կոմիտեի<br/>կողմից<br/>Գիտության և տեխնոլոգիաների<br/>պետական կոմիտեի նախագահ</p> <p> Բ. Վ. Վոյտով</p> |
|--|--|